

July
2019



KRISTIAN THALAI



Vol. X No. 5

Kristian Thalai Pawl Chanchinbu thla tin chhuak



WORK CAMP / HRJAITUTE CHANCHIN / SUNNA
KEIMAHNI / KANTU / HRINGLANG TLANG

KRISTIAN THALAI GOLDEN JUBILEE

INTER BRANCH QUIZ

COMPETITION 2019

Elimination Round 20th July, 2019
Semi Final 22nd August / Final 23rd August
@Dawrpu Kohhran
.....Live Telecast.....

THIANGHLIMNA
C. Lalremmawia

NI ENNA RAMAH
Lalengmawia

WALES ZIN REPORT

KRISTIAN TLANGVAL JOSEFA
Rev. K. Lalzarzova

STARDOM TO CHRISTIANITY
Nagma

NEICCYA CONFERENCE REPORT



Sakawluichhun Branch Leadership Training



Khawzawl Venglai Bial Leadership Training



Sateek - Leadership training



Champhai Zoflang Branch Diamond jubilee

Kristian Ṭhalai Pawl chanchinbu thla tin chhuak

1970-a chhuah ṭan - Kum 49-na vawi 7-na Chhuah tawh zat : 486

Editor :

Robert Lalduhzuala

Joint Editors :

C. Malsawmtluanga
Lalsiammawia Pachuau
Malsawmtluanga
K.Lalchhanhima

Manager:

Lalrinchhana Ralte

A lak man :

Kum khatah - ₹ 80.00
Copy khat - ₹ 7.00

*Thu chhuah tūr nei chuan Editor,
Kristian Ṭhalai, Synod Office-ah thawon
tūr a ni a; a la duh chuan KṬP Office-ah a
man pēk lāwk a ngai.*

Office Phone : 8794796008

E-Mail :

kristianthalai1970@gmail.com
centralktp@gmail.com

KRISTIAN ṬHALAI PAWL

Thupui

Rawngbawl tūra chhandam

Thupui inngahna

Ephesi 2:10 : Thil ṭha ti atán
Krista Isuaah chuan siama awmin,
ama kutchhuak kan ni si a, chu thil
ṭha tih chu kan awmna tūrín
Pathianin a buatsaih lāwk a ni.

Thiltumte

1. Isua Krista rinna leh amah anna kawnga ṭhalaithe hruai.
2. Kohhran kutke ni tura ṭhalaithe buatsaih.
3. Kohhran hnathawh tihpuitlin.
4. Krista Chanchin Ṭha puan darh.

A CHHUNGA THU AWMTE

1. Editorial	2
2. Sermon – <i>Thianghlimna</i>	3
3. Article – <i>Ni Enna Ramah</i>	6
4. Work Camp – <i>Marpara Ramthar Zin Thu</i>	9
5. Bible Study – <i>Kristian Tlangval Josefa</i>	11
6. An Chanchin – <i>Nagma-Stardom to Christianity</i>	14
7. Hruaitute Chanchin – <i>Benjamin Lalmuangpuia</i>	16
8. Wales Zin Report	18
9. Sunna – <i>Andrew Lalbiakmawia, Phaisen Branch</i>	20
10. NEICCYA Conference Report	22
11. Kantu	26
12. Hringlang tlang	28
13. Keimahni	29



JUBILEE

Kum 1970 a lo her chhuah khan, Kristian Ṭhalai Patol member-te khan kha kum kha KṬP-te tan kum pawimatoh leh KṬP history-a chuang reng tur a ni tih an ngaihtuah pha bik hauh lo vang. Amaherawhchu, kha kum kha Kristian Ṭhalai Patol rawngbawlna ropui leh nghet tak KRISTIAN ṬHALAI CHANCHINBU chhuah tan kum a lo ni reng si a. Tunah kum 50-na, Golden Jubilee hial kan lo thleng dawn ta a, a lawmatwm hle a ni.

Josua bung 13:1-ah khan Josua hnenah Pathian khan, 'I lo upain i lo tar ta hle mai a, ram lah chu lak tur a la tam mai si a,' a ti a. A upat tak avangin chawlh a pe lo va, ram lak tur a la tam thu a hrih a, hmachhawp a siamsak tihna a ni. Kristian Ṭhalai chanchinbu rawngbawlna pawh hian chawh lova hma lam pan ve zelin, Jubilee kan lo thleng leh dawn ta. Kum 50 hial rawngbawlna kawngah lo kal ve tawh mah se, hmachhawp leh hmabak hlen tur tam tak a la nei a, chumi tihlawhtling tur chuan keiniho hi kan pawimatoh vek mai a ni. Mawhphurtu dang kawh tur an awm chuang lo va, kan Jubilee kumah hian he kan chanchinbu rawngbawlna hi KṬP member-te ta a ni tih hre thar ila, i ngaihlu deuh deuh ang u.

Ram pum huapa KṬP-ten kan chanchinbu inṭawm neih chhun Golden Jubilee latwm turin member zawng zawngte inbuatsaih ila, rilru hlim leh phur takin Jubilee lam i hawi ang u. Pathian min hruaina ropui tak avangin latwm thu sawi ila, Jubilee hmang theia kan awm hi kan vanneihzia i hre bawh ang u. Chuvangin, hemi puala hun kan hman tur, Kristian Ṭhalai Inter-Branch Quiz Competition kan buatsaih te hi kan rawngbawlna atana kan sawtpui theihna turin hlut ila; a lawmna pui ber KṬP General Conference 2020, Serchhipa hmang turin member-te i lo inbuatsaih theuh bawh ang aw!



Hebrai 12:14

*"Mi zawng zawng nena inremna leh thianghlimna um rawh u,
chumi thianghlimna lovin tu man Lalpa an hmu lo vang."*

Thianghlimna tih hi thumal pakhtatah chuan a pawimawh hle a, Bible paw'n 'Thianghlim' tih hi wawi 1,084 zet a sawi nghe nghe. Inzirtirna pawh a tamin, thianghlim turin kan inchah nasa hle. Hnam changkang apiang an inzirtir nasa a, a chhan chu thianghlimna an ngaih pawimawh vang a ni.

THIANGHLIMNA CHU PATHIAN MIN HMUHTIRTU A NI

Tirhkoh Paula chuan, *"Thianghlimna lovin tu man Lalpa an hmu lo vang,"* a ti a, he a thusawi aṅang ringawt pawh hian thianghlimna hi a pawimawh takzet tih kan hre thei awm e. "Thianghlim ka duh," tia mahni intihthianghlim kan tum si loh chuan eng tihna mah a ni lo va, Nahaia chengkek lawh tum ang chauh kan ni dawn tihna a ni. Joba anga mi famkim pawh lo ni ila, kan thianghlim si loh chuan Pathian kan hmuh theih dawn loh avangin, Lalpa kan hmuh theih nan thiang-

hlim turin keimahni theuh kan inbuatsaih a ṭha awm e.

THIANGHLIM TURIN TIH BIK AN AWM LO

Lal Davida leh a fapa Solomona chuan thupek an chhuah a, chu an thupek chhuah chu *'Thianghlimna'* a ni. An pafaa thupek an chhuah chu Lal chhungkaw tana mi pawimawh bik – khawnbawl, sipai hotute leh an rama hotu lute chauh zawm tur ni lovin, lalram pum pui zawm tur a ni a; lal ina mi hnuaihnnung zawk nia lang – hla satute pawhin an zawm a, an intithianghlim a, kawngkhar vengtute thlengin thu-

pek zawmin an intithianghlim vek a nih kha. Hei hian thianghlimna pawimawhzia leh hlutzia min hmuhtir bakah, thianghlim turin tih bik leh thlan bik an awm lo va, mi hausa leh rethei zawk pawh ni se, kan zavaiin kan thianghlim vek a ngai tih a tichiang viau bawk.

THLARAU LAMA THIANGHLIMNA

Thlarau lama thianghlim a pawimawh takzet. Tunlai hian *revival* lam te leh kohhrana kan puipate pawh hian an thusawi zinga an sawi nasat pakhat chu 'Thih hnua kan thlarau kalna tur' hi a ni. Kan taksa a thiha, he khawvel kan chhuahsan hunah pawh kan thlarau a dam theih nan kan dam laiin keimahni kan inen-kawl uluk a pawimawh hle.

Thih hnu piah lam rama kan thlarauvin nun zalen a neiha, Lalthutthleng kianga Beramno faka kan zai ve theih nan kan dam lai hian thlarau lamah thianghlimna kan neih a pawimawh a, kan thlarau a thianghlim phawt chuan chatuan nunna nei turin nunna buah kan hming ziah a ni ve ngei ang. Tirhkoh Paula'n Rom khuua mite

chibai a buknaah, "Thianghlimna thlarau lam thu-ah erawh chuan mitthi zing ata a thawhlehna chuan Pathian Fapa a nih nasa takin a hriattir," tiin a sawi nghe nghe.

THINLUNG THIANGHLIMNA

Bible-a thu lar tak pakhat chu, "Nangni in thianghlim tur a ni, kei ka thianghlim si a," tih hi a ni. Kan Lalpa thusawi a ni a, Petera'n Pathian ringtute fuihna thu a sawiah he tawngkam hi fuih nan a hmang a ni. A hnung zuia a hnen thlen tum kan nih ve takzet chuan kan thinlung kan tithianghlim tur a ni.

Bawlhhlawh tak chungin Lal Isua hnung a zui theih loh. Thianghlim lo chuan kohhran leh thalai huangah te, khawtlang thleng pawhin harsatna an siam zawk thin. Awlsam tea tih mai theihah harsatna an siam tlat thin a, mi an hmu ro va, mi thatna lai hmuhsak an harsat bakah selna tur an zawng ruai thin. Thinlung thianghlimte erawhin mi that lohna lai aiin an thatna lai an hmuhsak thiam thin a, an tlin lohna laiah an dawm hram hram a, chak lohna leh fel lohna lai tam tak neitu kha tui

kianga thing phun, lui kama zung kai, khaw lum leh vawt pawh hlau lovin rinna lama hnufualte hnenah a theih-tawp a chhuah zawk ðhin.

**‘A KHER KHER’ I TIH LAI
KHA THIANGHLIMNA**

Naamana phar a thianghlim theih nan Jordan lua wavi sarìh inhnim a ngai a, Jordan lui kher khera inhnim kha a hreh ngawih ngawih a ni. Damaska khuua an luite chu Israel rama lui an neih zawng zawng aiin a thianghlim zawk lo vem ni a ti hial. Thinrim takin a kal tau nghawng nghawng a; mahse, a chhiahhlawhte chuan inngaitlawma, thinlung tisak tlat lo turin an va thlem a. Suria sipai lal a nih a vangin a dinhmun a sang em em a, chutiang taka hotu lian meuh tidam mai lova, a damna tura tih tur tuksak a ni te, a damna tura an kawhhmuh Jordan lui a ni kher kherte kha Naamana khan hriat thiam harsa a ti takzet a ni. A hnuah chuan thinlung tisak reng lovin, ‘a kher kher’ a tih chu a’n dai ta a, a rap a, wavi sarìh a inchiah a, a lo thianghlim leh ta a ni.

**THIANGHLIM TAKA
RAWNGBAWL**

Pathian kohhran hi cha-tuan lungpuia din leh innghat a ni a, keini mihringte’na kan tihchhiat mai mai theih ni lo mah se kan tibuai fo. Rinna nghet lo leh chak lo zawkte tana theihtawp chhuah tur kan nih laiin, kan rawngbawl dan a thianghlim tawh loh fo avangin kan thlen chin tur aia hmaah kan rawngbawlna a tawp phah fo ðhin.

Kohhran thingpui sen hi a hrisel a, khawi emaw laia thingpui in fo ai chuan kohhran thingpui hi keini ðhalaite tan chuan a hrisel a, kan thlarau nun thleng a nghawng avangin kohhran inkhawmah te, ðhalai rawngbawlna hrang hrangah te tel ve zel ila, kan tlin tawh lohna leh kan fel tawh lohnaa hma lam kan pan theih nan thingpui sen hang min lumsaktu Kohhran Upate leh KÏP hruaitute thingpui sen hang inthlittir hreh lo ila. Chutiang taka kohhran kan belh chuan thianghlim takin Pathian rawng kan bawl thei ngei ang.



August thla chawhnu lam hi chu ruah a sur duh viau mai th̄in a, zing lama a th̄at vung pawh hian chawhnu lam aṅang hian a rawn thim khup khup a, tlai lamah hi chuan a sur leh nghek mai th̄in. Kum 2012 khan Zemabawk tlangah ka pi leh pute inah hna exam turin ka inbuatsaih ve e ka ti a. Inrinni chawhnu vawi khat chu ni dang ang bawkin, chhun lama khua a lum tehlul nen, tlai lamah chuan a rawn thim khup khup a, ruah a rawn sur ta nghek mai a. Ka awmna pindan tukverh pawh khar lem lovin ruahsur tur rawn inṅham vel chu ka thlir reng a, kawl a phe zawr zawr a, khawpui lah chu tukverh darthlalang nghet lo deuh tiri chhek chhek khawpin a ri dur dur mai a, ruahsur lampang pawh ngaihtuah lutuk lem lovin khawvel chu ka thlir a.

Ka thlang lawka thing-kunte chu ruah chuan a nan a, a hnah te chu an che sep sep a, thliin a chhem dan ang hawi zel chuan an thle dial dial zel mai a. Hmuhnaawm ka ti hle a. A aia hla deuh zawk ka'n thlir a, kawngpuiah chuan motor chi hrang hrang hi an intlan pel leh zauh zauh th̄in a. Chumi kawngpui kama motor chhe siamna work-shop-ah chuan pa pakhat, tawnzau senduk, hlui lam-pang deuh, a nghawng leh a zak thla vel pawh uai deuh hnuang tawh, kekawr

uk da lampang, a khup thlenga thlep chho hian dar kum hlana inkuangkuah chungin kawngpui vel chu a thlir ve reng a. Eng tak ngaihtuah ve ang maw, tiin ka ngaihtuah mai mai a. Chumi workshop bul maiah chuan Chevrolet car zawrhna dawr lian hi a awm a, dawr bathlarah chuan nula leh tlangval rual khat, chu dawra thawk ni awm tak hi darhsarh deuh takin an awm laih laih a, a th̄enin bathlar khuaptu thir ban te chu an bawh a, a th̄en chuan bawh chiah lovin

an kutin an nem a, kawisawi deuh takin an ding hlawm a, an hawi lampang erawh chu a inang deuh vek a. A changin an nui leh ham ham thin a. Eng tak chu ngaihtuah ve hlawm ang maw, ka rilruin ka ti leh a.

A aia hla deuh zawk kan thlir leh a, ruah sur lohna tlangdung te chu ni sain a em iar mai a, chumi eng zarah chuan ruahsur paw chia i te chu a langsar viau mai. Khawiah tak nge ruah sur leh khaw tha chu a inthen ang le, chutah tak chuan ding ila, duh leh ruah do ila, duh leh ni sa do ila, tih te ka ngaihtuah mai mai a. Chalfilh tlang toh lurh mai leh a chung zawl duai mai te, a hring hlup a, ni sain a chhun eng ut na a, a chung zawn vel ni awm tak chu chhum dum hian a bawh thim khung thung a, ka rilru chu eng emaw ti tak hian a khawih deuh a. Engati nge maw ni le, ka ti a. Ka ngaihtuah chian chuan hla pakhat 'Hla taka khawdur leh ruahpui sur piah lamah sawn' tih hla chu ka rilru khawihtu chu a ni tih ka hre chhuak a. Chu hla chuan thil tam tak min ngaihtuah chhuahtir a. Ka awmna lamah chuan ruahpui

leh tek te, thlipui leh kawlphe te duhthalin inhrosa mah se, ral ram hla taka Sesawng leh Chalfilh tlangahte chuan ni a eng iar a, a boruak chu muanawm hliah hliah hian a lang a. A mawi mai a ni lo, a hmuhdawm a ni! Lung a tileng a, ngaihtuahna a chawk tho hial a ni!

Ka ngaihtuah zel a, hring nun kalsiam min ngaihtuah thlentir ta hial a. Mi finge'n an lo sawi angin, mihring nunah hi chuan khaw dur leh khaw tha te, hlimna leh lungngaihna ten ro an inrel chhawk reng a, chu hlimna leh lawmna, lungngaihna leh harsatna, thahna leh nuhna-te'n a nuai vel hring nun chu a lo hausa ta thin a, lei tha, thlai tinrengte mamawh chaw tha tinreng petu a lo ni thin. Ruahpui sur thum vung vung leh khawpui ri a inrawn un unna hnuai atanga ral ram hla taka ni eng mawizia chu ruahsur hnuai atang chuan a chiang em em a ni. Chutiang chu hring nun a lo nih chuan i nun leh ka nuna hlim ni leh lawm ni te, lungngaih ni leh thah ni te a inchawhpawlh chuat mai kha a lo hmutu tan chuan hmuhdawm leh zirtirtu ropui tak a lo ni thei

a, nangmahah a innghat ber mai.

Ruahsur hnuai aţang chuan ral ram hla taka ni eng mawi tak chuan nun dan min zirtir a, tunah hrehawm mah ila, ka hmaah chuan ni eng nuam tak mai a awm a, a hla tawh lo a ni tih min zirtir a. Mihringte hian harsatna chi hrang hrang tawk mah ila, khawvel hian dan fel tak, danglam ngai lo a nei a; chu chu – eng mah hi chatuan daih a awm lo, tih hi a ni. Tuna hlimte hi nakin lawkah an ţap ang a, tuna an hlimpuite hi nakina an ţahna titamtu a la ni ang. Chutiang chiah chuan, tuna ţap zawih zawiha khawvel hmang mekte pawh hi nakin lawkah chuan lawm avangin an la ţap leh ang a, tuna an mittui titla tamtute hi

nakina an lawmna tizualtu a la ni dawn a ni. Hring nun hi hriat thiam tura duan a ni lo va, Joba te anga patling lo chuan khawvel hi an hmachhawn fuh tak tak thei ngai lo vang.

A tawp berah chuan, chatuan ram min thlirtir a, he leia soal avanga thihna leh natna lo thleng ţhin hian ruahpui leh thlipui ang maiin kan nun hi nuai ţhin mah se, hla taka ni enna ram chu kan thlir ţhin a. Chu chuan min thlamuan a, eng pawh lo thleng se tiin puanven min sawi chhintir ţhin. A ni lo'm ni? Chuvangin zam miah lo la, kal zel ang che, i thleng ţep tawh a nia. Han thlir teh, saw chhimbale te pawh a zam chiai saw.

**KRISTIAN ŢHALAI GOLDEN JUBILEE QUIZ
ELIMINATION ROUND NEIHNA HMUN TURTE**

- Aizawl District : Dawrpui Bial - Dawrpui Kohhran*
- Lunglei District : Lunglei Bial - Chanmari Kohhran*
- Siaha District : Siaha Bial - Siaha Kohhran*
- Lawngtlai District : Lawngtlai Bial - Lawngtlai Bazar Kohhran*
- Champhai District : Champhai Bial-Champhai Vengthlang Kohhran*
- Kolasib District : Diakkawn Bial - Diakkawn Kohhran*
- Mamit District : Mamit Bial - Mamit Kohhran*
- Serchhip District : Serchhip Bial - Serchhip Kawnpui Kohhran*

Work Camp



Marpara Ramthar Zin Chu

*Lalbiakfela, Secretary, KṪP,
Zemabawk North Bial*

*K*um 2015 Bial Conference-in a lo pawm tawh, “Ramthar tlawhna atan budget siam ni rawh se,” tih chu kum 2018 thleng budget siam a ni a. Kum 2018 Bial KṪP Conference-in a tlawh tur Bial Committee kutah a dah a, Marpara Ramthar Branch tlawh ni se, a ti a. Marapara Ramthar Branch hian ringlomite ngaihhlut em em ‘**JISU MELA 2017**’ an lo buatsaih tawh a, he Jisu Mela aṅang hian ringlote’n Pathian an lo hnaih phah fo tawh reng a. Bial KṪP Committee chuan Rs. 20,000-a sponsor-in Jisu Mela hi kan hman ho leh thei ta a ni. Bial KṪP member 29 kan kal a, kan lawm hle a ni.

Kalkawng

December 14, 2018 (Zirtawpni) zing dar 6:20-ah Bial Chairman Upa H. Lalthuama’n ṭawngṭaina hun hman gin Pastor Quarters kawt aṅang kan chhuak a, dar 9:30 velah Rawpui-chhipah tukṭhuan eiin, tluang taka thlen kan inbeisei laiin, chawhnu dar 2:15 velah Saithah leh Phuldungsei inkarah kan bus spring a chhe ta thut mai le. Darkar hnih vel siam tuma hma kan lak pawhin, a thlakna mai tur a awm loh avangin siam mai theih a ni lo (A part Aizawlah

chah a ngai ta tlat mai). Kan chhiatna hmun aṅang hian Ashok Leyland (Tipper)-in zan dar 8:20-ah kan tum ram Marpara Ramthar Synod compound kan thleng thei ta. Kan thlen hian kohhran hruaitu, KṪP hruaitute leh Marpara-a kan thawktute’n zanriah buatsaihin min lo hmuak a, kan lawm hle mai.

JISU MELA 2018

Kan sawi tak angin, Jisu Mela hi December ni 13 zan aṅang khan ṭan a ni a. Inrinni zan hian kohhran inkhawmah Bial KṪP Asst. Leader Pu

Lalvensanga Pachuauvin Pathian thuchah a sawi a, inkhawm banah Jisu Mela chhunzawm leh a ni. Item sawm leh pariat vel neih niin zai, lam leh thusawitein hun hman a ni a. Hemi zan hian Bial Leader T.Upa Vanlalchaka'n thuchah a sawi. Jisu Mela-ah hian Bial KTP aţangin Worship Dance, group zai leh zaipawl neih a ni a, December 15, 2018 (Inrinni) zan dar 11:45-ah kham lo leh ui tak chungin zawh fel a ni.


MARPARA RAMTHAR KOHHRAN DINHMUN

Marpara Ramthar Kohhran hi kum 1960 khan din a ni a. Tunah chhungkua 92 awmin, kohhran mi zawng zawng hi 275 an ni a, danzawhkim 190 an awm baw. Bial chhungah hian kohhran paruk a awm a, heng kohhran tinte hi missionary eng emaw zatin an awmchilh mek baw a ni. Kohhran tina hla hruaitute hi ţhalaite an ni tlangpui. Marpara-a cheng naupang aţanga upa lam thleng hian zai leh lam an ngaisangin an ngaina em em a, Jisu Mela hi an thlahlel em em ţhin reng a ni.

December ni 16, 2018 (Pathianni) hian group thumah inţhenin Marpara huam chhunga kohhran BEKAB-EEKIA kohhran, TIPERA SORA kohhran leh LENGRA kohhrante tlawh a ni a. MSSU EXAM hun tak a lo ni baw nen, kohhran tinah exam hun hi an hmang kim thei a ni. Pathianni zanah Marpara Ramthar Kohhranah Bial Leader T.Upa Vanlalchaka'n Pathian thuchah a sawi. Inkhawm kan zawh hnu hian Marpara Ramthar Branch nen Joint Fellowship neih a ni a. Hun hlimawm leh hlawkpuiawm tak hman a ni.

TLIPNA

Kan kalkawngah harsatna te han taw. Kan ve mah ila, kan cham chhung zawngin Pathian hruaina leh awmpuina kan dawng a, a lawmawm hle. Marpara hmuna chengte hi a tam zawk chu *Buddhist* ti ila kan sawi sual awm lo ve. Hengho zingah hian Kristian nih duh si, mahse, harsatna avanga ni ngam lo tam tak an awm a, huaisen taka Kristian an nih theih nan i ţawngţaipui ţhin ang u.



Kan Pathian Lehkhabu Thianghlimah hian mi chi hrang hrang chanchin kan hmu a: a ðhen chu entawn tlak loh takte an ni a, a ðhen chuan chanchin entawn tlak tam tak an nei bawk. Tun ðumah hian Bible-a kan hmuh KṚP member rual mi pakhat chanchin i han zir dawn teh ang.

Tlangval Mistiri Josefa

Kan Bible ram chanchin kan hre ðhin a, Palestina ramah hian ran vulh a lar hle mai a. Kan Bible-ah pawh hian ran vulh leh a kaihhnawih chungchang hmun tam takah kan hmu a ni. Mistiri hna lam erawh hi chu mipui nawlpui-ina han thawh chi pawh a ni lo va. Mi tlem te, mi bikten an thawh ðhin a ni.

Mak angreng tak maiin tlangval Josefa hi mistiri a ni teh tlat a. A pute lam aṅang tawha mistiri hna thawka, lo inzirtir zel an ni em kan hre lo va, nih te pawh chu a ni mahna. Eng pawh ni se, KṚP member rual Josefa hi kut hnathawh ngaisang mi, a hnaa rinawm, a hna zahpui lo tak chu a ni tih hi chhinchhiah ila.

Josefa'n bialnu a nei

Mihringte hi kan Pathian thu chuan kan ðatlai chena, kan vanglai chen min phalsak tehmeuh mai. Khawvel dan pangngaiin tlangval mistiri Josefa pawh hian a lungdumtu a tawng ve tlat mai. An naupan lai aṅanga lo inngaina ru em em tawh an ni em kan hre chiah lo va. Dan pangngaiin a mipa zawk Josefa hian hma a la hmasa zawk turah te pawh ngai ila. An khaw tleirawl hmelfha leh nun mawi, sawisel kai lo Mari pawh chuan kut hnathawk mi mai pawh ni se, a nuna Pathian ðihna thuk tak leh a ze nghet chet chawt leh rin tlak tak mai a hmuh khiau avang te pawh chu a ni mahna, lo hnar zai rel bik lovin, hmangaih biahthu an

inhlana, kumkhuaa run hmuna leng dun turin zawlpuan an phah ta rup mai a ni.

Hmangaihna lamtluang chu

He mite pahnih inhmagaihna lamtluang hi a va bumboh tak em! An hnam dana lo inhual tawh an ni a, a tu emaw zawk pawhin an inhualna chu lo bawhchhiain, mi dang lakah lo chesual se, uire case hial charge theih an ni tawh ang. Chu chu an hre chiang dun khawp mai.

Tuk khat chu KṚP tlangval fel Josefa chuan chanchin lawmawm lo lutuk mai a hre ta tlat mai! A nupui hual, a duh em em, a rin em em Mari a rai an tih chu! Mahni bialnu te an rai thu han hriata, mahni tel ve bawk si loh chuan a hrehawm duh khawp ang le. Amah vanga rai te chu ni se thuhran, a ni der si lo. A ṫhian ṫha ber a ko pheih ang a, an ṫhian dunin hmalak dan tur te pawh an duang ta ve ang chu. An khua a lian si lo va, mi nawlpuiin Mari rai thu an hriat hunah chuan tlangval Josefa tan chuan men ngaihna a va vang dawn tehlu em! A thin a rim ang a, Mari te ina va kal lawka, va chhuah-chhalha, kut thlak hial te pawh a chakawm duh awm mang e.

Mahse, Josefa hian chutin a ti lo tlat mai. Kan Bible-in a sawi dan chuan, *"Josefa chu mi fel tak a ni a, tlangthantir a duh lo va, a ruka bansan a tum a,"* a ti. Mahni bialnu rinawm lo nia lang te laka KṚP tlangval Josefa rilru puthmang hi a va KṚP thlap thlap em! Mi dang tawrhrit duh lovin, zak taka inthiarfihlim a tum zawk tlat mai. Hei hi a ni lawm ni hmangaihna dik chu?

Josefa'n Lalpa aw a hria

Chutiang dinhmun hrehawm taka a awm mek lai chuan Josefa chuan Lalpa aw a hre ta. Josefa hian a hun takah 'Lalpa aw' hre lo ta se, ama tum dan ang khan kal tlang ta se a tífuh bik hauh lo vang le. Kristian ṫhalaite hian Lalpa aw kan hriat ṫhin a va pawimawh em! Inngaihzaawna thu-ah te, kan mi mal leh chungkaw nunah te, kan nupa karah te pawh hun harsa a lo thleng fo awm e. Henghun a lo thlen lai taka Lalpa aw hriat ṫhin hi a va ṫul tehlu em! Lalpa aw hre ngai lo KṚP member ni lo ṫheuh ang u aw!

Lalpa thu a awih

Josefa hian Lalpa aw a hria a ni ngawt lo va, Lalpa thu angin a ti nghal. Lalpa aw a hriat dan chuan a nupui hual

Mari chu nupuiah a nei tur a ni. A fa pai pawh Thlarau Thianghlim laka mi a lo ni a. A fa hrin tur chu mipa fa a ni dawn a, a hming tur nen lam sak sa thlap a ni. Josefa hian Lalpa aw a hriat hi a ringhlel miah lo. Lalpa'n a hnena a sawi ang chiah chiahin a ti nghal vek nia. Amah raisantu a bialnu chu Lalpa thu a nih avangin nupuiah a nei a, a fapa lo piang pawh Pathian thu ang thlapin a hming a phuah ta a ni. Mahni tana mualphona tur thil pawh ni se, mahni tana tha lo tur nia lang thil pawh emaw, mihring ngaiha tuiawm loh tak tur thilah pawh, Lalpa thu anga kal ngam Kristian thalai Josefa hian zirlai min hnutchhiah tha hle mai.

Lalpa thu a awih leh

Josefa em em hi a mak ngawt mai. Mi hlim chauh hian Lalpa aw hi an hre tur em maw te hi kan ti thin a. Mahse, mang lamah pawh Lalpa'n a mite hnenah thu a sawi thin tih a lo lang leh ta. A mumangah Lalpa'n Aigupta rama naute leh a nu tlan bopui turin a hrilh leh ta. Chutah pawh chuan Lalpa thu awih takin Aigupta ramah chuan a kal leh mai. Lalpa thu awiha, mahni fa tak tak pawh ni hlei lo hetiang

phar pharpui peih Josefa hi a va ngaihsanawm em! Kristian thalaite hi rawngbawl tura chhandam kan nih tlat avangin, thlarau bo pakhat chhanchhuah nan emaw, sual bawiha tang kan member-puite chhanchhuaha an awmna tur emaw a nih dawn phawt chuan, mahni tan chuan hlawk dawn lovin, lo hahtlak deuh pawh ni se, kan phar dawr dawr zel mai tur a nih chu.

Lalpa thu a awih leh cheu

Lalpa thu angin Aigupta ramah a nupui fanaute a tlan bopui a. Zan khat chu thu thar a lo awm leh ta. Aigupta ram atanga kir leh tur thu a ni. Hetah pawh hian Josefa chuan Lalpa thu a awih leh thlap a, a nupui fanaute chu Lalpa thu angin an ram lamah a kirpui leh ta a ni.

Josefa hian a naupan tet atangin Pathian a tih tih chiang takin a lang thei. A bialnu neih thu-ah te, a nupui neih thu-ah te, a chhungkaw din dan leh a nupui fanaute a kaihhruai dan kan han sawi tak atangte pawh hian, a nunah Pathian a lal hle a, a nun hnarkaitu, a nun kawng hruaitu leh thuneitu chu a Lalpa chu a ni tih a lang thei awm e. Keini KTP member-te hi engnge kan an ve hlawm le?



An Chanchin *Nagma Stardom to Christianity*

*N*andita Arvind Morarji, *Nagma* tia khawvelin a hriat lar zawk hi India film khawvelah chuan a lar ber pawl a ni hial awm e. Kum 1990 chho velah phei chuan Tamil Nadu-ah ani ang tluka hralh kal leh lar an awm lo. Film chi hrang sawmsarih chuangah a inlan tawh nghe nghe a ni.

December 25, 1974 khan Mumbai-ah a lo piang a, a pa hi Hindu niin, a nu erawh Muslim a ni thung. Amah hi graduate niin ÷awng chi hrang, heng – English, Hindi, Marathi, Tamil leh Telugu ÷awngte'n nal takin a ÷awng thei a ni.

Hetiang hian Kristian a lo nih tak dan a sawi.

Ka naupan laiin Catholic sikul, Mount Mary Convent, Bandra, Mumbai-ah ka kal ÷hin a. Hei vang hian Kristianna chungchang hi chu ka hre viau. Chuta kan kal lai chuan ÷awngtai hun hi kan hmang ÷hin a. December 25, Krismas nia piang ka nih avang hian ka tet lai a÷ang rengin mi *special* bik niin ka inhre ÷hin.

Chung hun lai chuan Kristian ka ni lo na a, Lal Isua awmpuina leh Amah nena

inlaichinna ka neih ÷hin chu nuam ka ti thei hle. Mahse, tu ma hnena han sawi chhuah chi



kha a ni lem lo va. Ka lo puitling a, "*Conversion with God*" tih lehkhabu ka chhiar a÷ang chuan, khang ka naupan deuh laia min awmpui ÷hintu leh ka nuna thusawi ÷hintu chu Isua ngei hi

a ni tih ka hriat chian phah ta hle. Ka hun kal tawh a nghet taka min chelh reng thintu chu Lal Isua hi a lo ni reng a ni tih pawh ka ngaihtuah ngai lo.

Kum 15 zet mai film chi hrang hrang changin, hlawhtlinna nasa tak ka chang a. Mahse, chung zawng zawng chu a ho em em vek maiin ka hria. Chung chuan hlimna min pe tak tak lo va, keimahah ruak a awm tlat a ni. Keimah leh keimah zawhna ka inzawt a: *Eng vangin nge hetah hian ka awm reng? Pathian hian ka nunah hian eng nge tum a neih? Eng nge khawvela ka lo awm ve ngawtna chhan hi? Heng zawhna avang hian lehkhahu hrang hrang ka chhiar hnem phah hle. Hetiang thil ngaihtuah hian hun fianrial ka hmang ta fo va.*

Keimaha zawhna awmte chhanna a nih beiseiin 'Art of Living' (Hring nun hman dan tur inzirtirna) chungchang zirtirtuah kum 12 chhung zet ka țang zui ta nghe nghe a ni. Mahse, ka rilru chhungril tak takah chuan Isua chungchangin hmun a luah reng a, ka ni (A ni hi Kristian a ni a) chu Lal Isua chanchin min hrilh turin ka ngen fo thih. Tichuan, kum 2000 kum chuan Lal Isua hnenah chhandamna dilin ka țawngțai ve thei ta a ni.

He thil hi khawiah mah ka puangzar lem lo. Tin, Bible

pawh ka chhiar zui lem chuang lo va. Kum 2006 kum khan ka damlo vak mai a. *Viral fever* neiin *doctor* te pawh min enkawl dan turah an buai hle. Ka khawsik a san em avang chuan damdawi inah min *admit* ta a. Chutah chuan Punjabi pa pakhat hi a lo kal a, sermon CD "Freedom from fear" tih *Brother Johnson-a* sawi chu minrawn pe ringawt mai a. Chu *sermon* chu ka ngaithla ta tluk tluk mai a, thla ruk hnuah chuan Pathian thu chhiara, *Bible* zir chu ka tih ngei ngei tur niin ka hre ta a ni. Pathian hnenah țawngțaiin, 'Lalpa, i thu ka zir țan dawn a, min zirtirtuah lo țang la, hre thiam turin min pui ang che,' tiin.

Chumi ka chhiar ațang chuan *baptisma* chan a țul thu te, Amah be tura biak ina kal a pawimawhzia te ka zir chhuak a. Tichuan, kum 2007 January ni 4-ah chuan *baptisma* ka chang ve ta a ni. Hemi hnu hian ka thiltih thih eng emaw zat kalsanin, ka hun tam zawk chu ka room-ah inkalh khumin, țawngțai nan leh *Bible* zir nan ka hmang ta a ni. Chanchin Țha hrila, Pathianin min kohna apianga kal turin ka inpeih a ni. Beidawnga intihhlum hial ka tum laia min chhanchhuaktu chu *Bible* hi a ni a, Lal Isua hnena ka nun ka hlan chinah ka harsatna zawng zawng pawh lak kianin an awm ta zel a ni.

HRUAITUTE CHANCHIN

Benjamin Lalmuanpuia

Committee Member

Benjamin Lalnunpuia hi June 21, 1981 khan C. Roliana leh Lianzuali-te fa pahnihna ni turin Champhai Kahrawtah a lo piang a. Pianpui unau 6, mipa 4 leh hmeichhia 2 a nei a ni. Champhai Primary School I-ah zirna bul tanin, B.A. thleng a zir a ni.

Amah hi fiamthu ngaina tak, mi hlim thei tak leh than ngaina tak a ni. Infiamna lamah chuan football hi a ngainat ber a ni a, veng tan leh club tan pawh medal a lo awrh ve nual tawh a ni. Volleyball leh cricket pawh hi thiam lutuk lem lo mah se, a game ngainatte zinga mi a ni bawh.

Thlahtute a tang renga kut themthiamna lam nei tih takah tunah hian Arm Repairing leh *Blacksmith* lam hna thawkin ama *workshop* enkawlin eizawna a kalpui mek bawh a ni.



Rawngbawlna lam – Kum 2007-ah Kanan Branch KṚP Committee member-ah lutin, kum 2010–2018 thleng Office Bearer-ah thlan a ni a. Chawnpui Biala a awm laiin Bial Zaipawl Member (2005-2011) term thum chhung niin, Bial KṚP Committee Member 2013 kumah a lo ni tawh bawk a ni. Vaivakawn Bial KṚP Asst. Secretary rawngbawlna term hnih (2017, 2018) a chelh tawh bawk a ni. Tunah hian Bial leh Branch-ah Ex-Officio-in a awm mek a ni. A lawina Kanan Kohhranah Inrinni zan thuhritu, Sunday School Committee Member, Primary Department Leader rawngbawlna a chelh mek a ni.

Ṛah Hla 3:25,26, “Lalpa chu amah nghaktute tan a ṫa a, amah zawngtu tan chuan. Lalpa chhandamna beiseia nghah veng veng chu a ṫa a

ni,” tih hi a Bible chang ngainat tak a ni a, KHB no. 335-na, “Ka hnenah lo kal thuai ang che,” tih hla hi a duh hle bawk.

Ei leh in lamah chuan ei tura siam tawh chu ei theih loh em em a nei lo va, chutih rualin chawhmeh hming sei lo apiang a ngaina emaw tih tur a ni. Ei leh in lamah chuan sawm a hautak lutuk awm lo ve.

KṚP member-te a chah duh chu – ‘*Lalpa ṫih tlat chungin rawngbawlna ngai pawimawh ila, mahni intodelh ila, chhungkua, kohhran leh khawtlang tinuamtu, Isua chanchin ṫa ngai pawimawh, rawngbawlpuite tana thawhpui nuam nih tum ila, rawngbawlna pawhin hma a sawn zelin a rinawm.*

THUZIAK TURA SAWMNA

Kristian Ṛhalai chanchinbua chhuh tur Sermon, Article, Ngaihnam Ngaihawm leh a dangte chhuh tur nei chuan eng tik lai pawhin a theh luh theih reng a, ṫahnemngai taka ziak turin kan insawm bawk a ni. *Sermon* leh *Article* hi word 1,000 vela ziah theih ni se; tin, *Ngaihnam Ngaihawm* hi word 700 vela ziah tum ni bawk se. Heng kan thuziakte hi Pagemaker emaw, MS Word file-in emaw kristianthalai1970@gmail.com theh luh tur a ni e.

WALES ZIN REPORT

April 9, 2019 khan Mizoram Synod Moderator, CKTP Leader, Asst. Leader leh Synod Choir-te chu sawm an nih angin 'International Choral Festival Wales 2019'-a tel tur leh rawngbawlna hrang hrang nei turin an kal.

Rawngbawlna hmunte

Biak In/Kohhran

1. Bethel Chapel, Liverpool
2. Bethesda Chapel, Mold
3. Mawr Chapel, Denbigh
4. Llansanan
5. Berea Newydd Chapel
6. Tegid Chapel, Bala
7. Morfa Church, Aberystwyth
8. Crwys Chapel, Cardiff
9. Salem Canton, Cardiff
10. Sandfields, Port Talbot

Hmun dang

1. Care Home, Pendine Park, Wrexham (Tar enkawlina)
2. Senned, Wales National Assembly House, Cardiff
3. Tabernacle Chapel, Cardiff
4. Llanw Festival, Tenby

Missionary thlan tlawh

1. Abergele - Zosaphluia leh Pu Owen-a te nupa.
2. Prestatyn - Pi Puii hriat rengna lungphun leh Pu Lloyd-a te nupa thlan.
3. Bangor bul - Pu Robert-a te nupa thlan.
4. Bala - Pi Teii thlan.

**Thlân tlawhnaah hian Moderator-in pangpar dahin lawm thu sawi ðawngtaina hun a hmang zel a, Zaipawlten "Aw Pathian, Nangman Chanchin Tha min pe" tih hla an sa zel bawk a ni.*

Programme dang

1. Bethel Chapel, Liverpool-ah hian PCW Overseas Mission chanchin leh bul ðan dan te, hma an lak dan leh an rawngbawl dan chanchin 'Why India?' tih thupui an zir ho.
2. Bala-ah Mary Jones Centre kan tlawh a, Mary Jones-i zin kawng chanchin leh Bible Society lo pian chhuah dan te an zir ho.
3. Trefeca-ah Wales rama harhna lo thlen dan chanchin te, harhna hmahruaitu Howell Harris-a chanchin te an zir ho.
4. Aberystwyth-ah Zosap Pu Zawna nupui Pi Zawni'n an rawngbawlina arawn chhim

a, zanriah an kil ho. Pi Zawni hi kum 100 laia upa a ni.

5. International Choral Festival Wales 2019-ah an tel a, Open Category-ah lawmman pakhatna an la a, final round, "Choir of Choirs" zawnnaah an tel leh bawk.

6. Llanw festival-a an awm laiin Welsh National TV channel "SC4"-a tihchhuah turin an hla 2 music video an siamsak.

7. Swansea City kum 50 tlin lawmna pakhat atan programme an siamah 1904-05 chhova Wales ram harhna hmahruaitu Robert Evans sulhnu chhuina "Calon lan series" atan "Calon lan" (Khawvel sum tinreng leh lunghlu) sa turin an ngen a, music video an siamsak nghal.

8. BBC Wales Radio station-a Shan & Coffee live programme-ah an zai.

Llanw Festival

Llanw (Thlan-u) festival hi Wales rama kohhran hrang hrang țang rualten Easter Sunday denchhena "Thawhlehna lawmna" programme an buatsaih țhin a ni a, kumin hi a țum 12-na a ni. Wales ramah Kristianna a tlakhniam mek lai leh kohhran mi an tlem tial tial laiin Kristiannain hma a sawna, Pathian ram a lo zau leha, Wales rama Thlarau

Thianghlim harhna a lo thlen leh theih nana an buatsaih țhin a ni a. Wales ram chung hmun hrang hrang ațangin Kristiante an pung khawm a, kohhran din tawh lohnaa ringtu khawhar taka awm mēk te, mumal taka kohhran dinna hmuna mite nena inpawl khawmna hun a ni ber a. Nausen ațanga tar thlengin an kal khawm a, a kum telin heta tel hi an pung zel a ni.

Wales-ah hian Mizoram Synod Moderator-in kohhran an tlawh hrang hrangah chibai bukna leh tuna Mizoram Kohhran dinhmun tlangpui report a pe țhin a. Leader hian chibai bukna leh Wales kohhran hnena lawm thu sawina leh thuchah tawi a sawi țhin. Asst Leader pawhin chibai bukna leh zaia rawngbawlna țum khat ve ve a nei bawk. Heng bakah hian India ram politics boruak sawiin Leader leh Director-ten hun an hmanğ bawk. Wales rama an cham chung hian zaipawl hi țum 36 din chhuahah wawi 97 an zai a, India ram pan tura an haw kawngah UK Zofaten an lo dawngsawng a, April 29, 2019 chawhnu dar 2:00 khan Mizoram an rawn thleng leh ta a ni.



SUNNA

ANDREW LALBIAKMAWIA

Phaisen Branch

Pian leh murna

Pu Andrew Lalbiakmawia hi Pu Lalringa (L) leh Pi Biakliani-te fa pali zinga naupang ber niin, ni 11 November 1984 khan Phaisenah a lo piang a, farnu pathum a nei. Mize zawi leh mi pawisawi hlau tak, nu leh pa thu awih thei tak a ni. Kum 2013 khan Rebeck Lalrinkimi nen inneiin, fa hmeichhia pahnih an nei.



Rawngbawlina lam

Kohhranah : Pu Andrew Lalbiakmawia hi kohhran bel tlat mi a ni a, a phak ang tawka kohhran rawngbawl hna ngai pawi-mawh mi a ni. A boral lai hian Kohhran Zaipawl leh Ramthar Committee Member ni lai a ni a. Sunday School lamah Junior Dept. Leader a ni mek bawk.

Branch-ah : Kum 2006-ah Kristian Thalai Pawl, Phaisen

Branch Committee-ah lut ÷anin, Branch-ah – Leader, Asst. Leader, Secretary, Asst. Secretary leh Fin. Secretary-te a lo ni tawh a. A boral ni thlengin Asst. Secretary chanvo a chelh a ni.

Bialah : Kum 2014 khan Bilkhawthlir Bial KṚP Committee-ah lut ÷anin, Asst. Leader, Asst. Secretary leh Fin. Secretary chanvote a chelh hman a. A boral lai hian Asst. Leader chanvo a chelh mek a ni.

Khawtlangah : Khawtlang rawngbawlna lamah hian YMA lamah Fin. Secretary te, Village Council Secretary leh VEC-ah Fin. Secretary nihna te a lo chelh tawh ðhin.

A hun hnuhnung

Tha nâ neiin, kum 2017 aţang khan a na zual ðan a. Bial OB-te pawhin tlawhin, ðawngţaina te hmanpuiin kum tawp lamah a ziaawm leh a. Mahse, kum 2018 May thla vel khan a natna ngai baw chu rawn chhuak lehin, August thla aţang pheh chuan biak in pawh a thleng peih ta meuh lo va. September ni 16, 2018 (Pathianni)-a Senior Department Inkhawmpui a chhim chu biak ina a inkhawm hnuhnun ber a lo ni ta a ni.

A pum te a lo puar a. Ni 19 Sept. 2018 khan Seventh

Day Adventist Hospital-a inentir tura a kal chu lo admit-in, ni 20 Sept. 2019-ah zai a ni a. Hemi hnu pawh hian ziaawm lam a pan theih meuh loh avangin biopsy te lak a ni a, cancer natna a ni tih hmuhchhuah a ni ta a. A natna chu lo zual zelin, ni 13 Oct. 2018 dar 2:15 pm-ah chuan ðahnemngai taka a rawng a lo bawlsak ðhin Pathian hnenah min chawlhlan ta a ni.

Tin, ni 14 Oct. 2018, a vui ni hian Kohhran Zaipawlten a thlahna hla kan rem a. A ruang hi Bial KĶP hruaituten thlanmual thlengin an zawn a ni. Hetianga Pathian leh a kohhran tana mi inpe, rawngbawlna ngai pawimawh em em mai kan lo ðen ta mai hi a pawh kan tiin kan ui takzet a. A kalsan tak a nupui fanaute Pathianin awmpuiin thlamuan zel se tih hi kan ðawngţaina a ni e.

KRISTIAN ðHALAI HRIATZAUNA

- A. Kristian ðhalai issue hmasa ber**
- i. Phek 46 a ni.
 - ii. Nazareth Press, Aizawlah copy 1,000 chhut a ni.
 - iii. Copy khat hi pawisa 50-a hralh a ni.
- B. Mizo zinga CKĶP Leader hmasa ber chu Rev. C Pazawna a ni.**

NEICCYA BIENNIAL CONFERENCE VAWI 18-NA REPORT

Zothanmawia, Lungleng I

India hmarchhak Kristian, kohhran hrang hrang thalaite lintawh khâwmna, North East India Christian Council Youth Assembly 18th Biennial Conference chu May 17-19, 2019 chung khan Assam State, Jaraguri District, Kokrajhar-a Bajugaon Presbyterian Independent Church-ah nghah a ni a. He Conference-a palai tur hian Central KṚP aiawha palai kalte hi Central Committee aṅgin mi 13, Bial aiawh mi 2 leh Sihphir Bial Zaipawl member 23 leh Sihphir Bial OB 2, kan zavaiin mi 40 kan tling a, a lawmawm hle mai.

May ni 16 (Ningani)

Dar 1:30 p.m.-ah Synod Office aṅgin Central Committee leh Bial aiawhte bus pakhatin kan chhuak a. Sihphir Bial Zaipawlin Sihphirah min lo nghâk a. Sihphirah hian zin kawng tuang taka kan zawh theih nân kan Leader, Rev. Dr. K. Lallawmzuala Pathian hnênah a ṭawngṭai a. Tichuan, bus pahnih hmangin a tuk May 17 (Zirtawp) tlai dar 5:00-ah kan conference-na tûr hmun Bajugaon Presbyterian Independent Church Biak In tual nuam tak chu buaina leh harsatna tâwk lovin kan thleng a ni.

NEICCYA 18th Biennial Conference-ah hian “Blessed are the Peacemakers” (Mt. 5:9)

tih chu Conference thupui atân hman a ni a. NEICCYA - ah hian India hmarchhak aṅgin Unit 41 kan awm mêk a ni.

Kan thlen hlimin thlengtu lamte’n zanriah tui tak min lo buatsaihsak chu kan ei nghâl a. Mipaho chu Jitnal Narginary (M) Amalgamated English School room lamah riakin, hmeichheho chu Jaraguri Higher Secondary School lamah riahtîr an ni thung a. Sikul compound zau leh room nuam takah min thleng a ni.

May ni 17 (Zirtawpni)

Kan thlen zan, May ni 17 zan dar 6:00-ah ‘Praise and Worship’-a hun hman a ni a. Rev. A.I. Kharshiing, Vice

hun hman a ni leh a. He hunah hian Rev. Jubileethang Hrangchal, Asst. Secretary leh Dr. David C. Vanlalfakawma, Fin. Secretary, NEICCYA-te'n min kaihruaiin, unit hrang hrang zaipawl leh special item-a hun hman a ni a. CKTP ațangin Sihphir Bial Zaipawlte'n Group singing, Worship Dance leh Cultural Dance (Sârlamkai) te thiam leh hmuhdawm takin palaite min entir bawk. Chanvo changtu zawng zawngte an thiamin an inbuatsaihna a țha a, a hmuhdawmin ngaihthlâk a nuam a, kan hlâwk hle a ni.

May ni 19 (Pathianni)

May ni 19 (Pathianni) zing, tûkțuan ei kham dar 9:30-ah Worship service-a hun hman a ni leh a. Kan inkhawm Rev. Khrawbok Rympei, Treasurer, NEICCYA in min kaihruai a. Rev. Donkumar Lyngdoh, EC Member-in thu ngaihndawm tak a sawi a, zaipawl eng emaw zat zaiin CKTP ațangin Sihphir Bial Zaipawlte'n Pathian fakna hla mawi takin an rem leh a ni.

Chawhnu dar 1:00-ah pandal lamah tho Worship Service-a hun hman leh a ni

a. Mr. Manbhalang Chyne, EC member-in min kaihruai-in kan Leader, Rev. Dr. K. Lallawmzualan Pathian thu țha tak a sawi a, Sihphir Bial Zaipawlte'n Pathian fakna hla mawi takin an rem leh bawk.

May ni 19 (Pathianni) zan

Pathianni zan dar 6:30-ah pandal-ah Worship Service-a hun hman ni lehin, Rev. Eleazer Sanglyne, Ex-Officio Member-in min kaihruai a. Rev. Dr. Ramengliana, Secretary, NEICC-in 2019-2021 NEICCYA hruaitu tharte Pathian hnênah a hlân a. President kal chhuak, Mr. H. Lalthanglian Pathian thu (Valedictory Message) a sawi a; Rev. Salem L. Hmar, Secretary-in lawm thu a sawi bawk. Zaipawl, malzai leh band ngaihndawm tak tak ngaithlain, CKTP ațangin Sihphir Bial Zaipawlte'n Pathian chawimawina Mizo hla mawi takin an rem a.

Hnu khâr nân thlengtu lamin an hnam incheia incheiin Pathian fakna hla an rem a, palai inkhawm zawng zawngte, an tih dân anga an lám zâwm vè tûra min sâwm angin kan hruaitute hnung zuiin theihtâpw chhuahin

Pathian fakin kan zaiin kan lâm a, 'Khawvêl lâm mahin an lâm ngam alâwm' titu kan hruaitu pakhat kawr hnung pheï chu a huh zawr hneh viau a ni. Pathian nung betu, Kristian nih a manhla hle mai. Pathianni zan dar 11:30 a lo ri a, kham lo leh inthlahlel tak chungin NEICCYA 18th BIENNIAL CONFERENCE chu kan ñiak ta a ni.

Kan haw ta!

May ni 20 (Thawhñan) zing dar 5:00-ah kan conference-na hmun Bajugaon chu thlir zui ñawk ñawkin kan vai liam a, mahni in lam panin kanrawn hâwng leh ta a ni. Pathian venhimna, khawngaihna leh malsawmna changin a tûk, May ni 21 (Thawhleñni) chawhnu dar 1:00-ah Aizawl kan lut a. Kan hnunga lo kal, Sihphir Bial Zaipawlte pawh traffic jam vangin han khawtlai deuh mah se, tuang takin zan dar 10:00 vêlah an thleng fel thei a ni.


Lawm thu

Tûn ñum NEICCYA 18th Biennial Conference kan neihna hmun hi thingtlâng khua a ni chungin hmunhma an nei ña a, a mi chêngte an

hawihhâwmin mikhualte min duat thiam takzet a, Conference boruak a nuamin a hlâwkpuiawm a, an zînga khawsak a khamawm loh hle. A ram mi chêngte Kristianna a nghet ña hle mai a. Kan Conference nghahna Bajugaon Presbyterian Independent Church Biak In hi kum 1911-a Kristian chhungkaw pasarihte intêl khâwmin an din a ni a, an biak in a nuamin an sikul building leh compound a zau va, an phuisui hle a ni.

Bial aiawha kalte leh zaipâwlte tân kan Central hruaitute thlazâr hnuaia awm a hahdamthlâk takzet a, min ngaihsakin min dah pawimawh thiam a, an bula awm a nuam hle mai.

A tâwp berah chuan mi mal, Branch leh kohhranho, min lo ñawngñaisaktu zawng zawng te leh kan kal chhan leh conference neitu – kan Pathian hnênah lâwm thu kan sawi a, kan thupui ang hian, kan ram leh hnamah remna a lo par chhuah zêl theih nân, remna siamtu ni zêl turin Kristian ñhalaite'n A rawng kan bâwl Isua Krista tân ñan i la zêl ang u.



KANTU

Sevenphul Branch

KŦP, Sevenphul Branch hi kum 1991 April ni 6 (Inrinni) ah din a ni a, Tachhip Kohhran aṅanga indang a ni. Tunah hian member 117 (Mipa 90 leh hmeichhia 27) kan awm mek. Aibawk Bial chhunga awm niin, Aizawl aṅanga km. 24-a hlaa awm a ni. Kuminah hian Group thumah inṅhenin, group hming chu Estheri, Mari, Ruthi Group-te a ni. Group Budget hi kum khat chhung atan Rs. 21,000/- ṅheuh niin, group tinte'n kan tuak ngah tawh nghe nghe a ni.

Branch Committee Member 20 (OB 6, Member 14, Kohhran Committee aiawh 1) kan awm mek a. Branch Committee hi thla tin Ningani zan hmasa berah ṅhut ṅhin a ni. Kum tirah Branch budget siam ṅhin a ni a. Kumin 2019 Branch budget chu Rs. 3,11,000/- a ni a, budget tuak dan tlangpuite chu: inhlawh, hnatlang, Group budget, Faith Promise, rawra thiar, blanket suk, hlo thlawh, huan sam, tumkau hralh, electric bill khawn leh a dangte a ni. Branch project pahnih zinga pakhat zawk Electronic Drums chu lei tawh niin, kumin aṅang hian

ramthar zinna tur atan sum dah tum a ni a, General Conference 2020 Serchhip kal nan sum dah tum a ni bawk.

Branch-in missionary 2 kan chawm mek a, KŦP member aṅangin Synod Mission Board hnuaiah missionary 2 kan chhuak ve mek bawk. Kuminah hian Branch Kum Puanah 'Zuk leh hmuam do' tih kan hmang a. Holy Bible ziaak chhuak turin hmalak mek a ni bawk. Branch Rising Day hi kum tin ruai nen hlim takin chhun leh zanah lawm ṅhin a ni a, Branch member a thei thei kan haw khawm ṅhin a, a hlimawm thei hle a ni.

Kum tir aţangin Branch Calendar siam ţhin a ni a, a theih chin chinah Calendar siam milin hun hman ţhin a ni. Branch Committee hnuaiiah hian Branch tihchak nan Committee peng hrang hrang pasarih, heng: Programme, Decoration & Usher, Sport, Evangelical Cell, Documentation, Music leh Refreshment sub-committee te din a ni. Kum 1999 July ni 13 aţang khan "ţhalai Arsi" tih chanchinbu chu Pathianni tin tihchhuah ţhin a ni a, kohhran mipuite'n an hlut hle a ni. Kristian ţhalai chanchinbu hi copy 41 lak mek a ni bawk.


Member, biak in hawnga innei an awmin lawmpuina thuziak leh present hlan ţhin a ni a, Group lam pawhin lawmpui nan present an pe ţhin bawk. Member thi an awmin ralna hun hman ţhin a ni. Central KţP leh Bial

aţanga thiltih tur awmte kan ngai pawimawh hle a, a hun takah bawhzui ţhin a ni. Bial chhung inelna report form-ah lawmman pakhatna kum riat chhung kan la tawh hial a ni. Veng chhungah ţanpui ngai an awmin tha leh sum leh paitein a ţul anga ţanpui ţhin an ni. Branch Award siam ţhin a ni a, Member of the Year leh Branch Kum Puan Award-ahte award inpek ţhin a ni.

Kum tin December thla hian ţanpui ngaite pualin kohhran in tinah Krismas Carol Service hman ţhin a ni. Hruaitu, kum over thlenga ţang an awm chuan an puala fellowship hun hmangin, ngaihhraina thilpek hlan ţhin an ni bawk. Kuminah hian Bial KţP Conference dawngin, October thla hian Bial KţP Meet dawng turin kan inbuatsaih leh mek a, member-te kan phurin ţan kan la nasa hle a ni.

YRC-PHASE II HNA ESTIMATE TIHNIAMIN THAWH CHHOH TUM MEK A NI

YRC sak hna pawh a kal mek zel a, tunah hian Phase II, Covention Centre sak hna ţan tura hmalak mek a ni. Phase II sakna tura ruahman sa, estimate pawh kan tlin tawh tura ngaihnh tihhniam a ni tawh nghe nghe a, hmalakna tluang taka a kal zel theih nan Pathian hnenah i hlan ţhin ang u.



HRINGLANG TLÁNG

CHI A AL!

Hmanlai hian lal khawnbawl fíng tak mai hi a awm a. A hihna takah chuan lal khawnbawl chu a fíng hauh lo va, fíng anga a lan chhan chu a chhiahhlawh eisiam fíng tak vang zawk a ni. Eisiamtu chu a fin em avangin a pu chuan malsawmna leh duhsakna tam tak a dawn phah thín a ni.

Tlai khat chu lal hian a khawnbawlte inah chuan zanriah ei a duh ta tlat a. Lal chuan, “Mihring nun tidanglam vek thei khawpa tui ei ka duh,” a tih avang chuan lal khawnbawl chu a mangang em em a. A ei siamtu chuan, “Ka pu, lungngai reng reng suh,” a ti a.

Lal leh a khawnbawl dangte an lo thleng a, zanriah chu an han buatsaih ta a. Chawhmeh chi hrang hrang hi an rawn chhawp a. A tawp berah chuan nun tidanglam thei khawpa tui chawhmeh chu bel pahnihah hian an rawn chhawp ta a.

Lal chuan a han a ei a, “Umm, eng thil nge ni? A va’n tui em!” tiin a zawt a. Eisiamtu chuan, “Aw lalber, bawng lei a nih hi. A chhan chu lei hi mi dang malsawm nan te, beiseina leh hlimna siamsak nan tea

hmanraw țangkai a ni a. Chu vang chuan mihring nun tidanglam theitu chu lei hi a ni,” a ti a.

Lal chuan chawhmeh dang pakhat chu a’n ei leh a. “Hei chu a va han tui lo em!” a ti a. Eisiamtu chuan, “Tuna tui lo in tih em em hi bawng lei tho a ni. A tui tak loh em em chhan chu a sawngbatwl nan chi ka telh loh vang a ni. Chutiang chiah chuan, kan țawngkam chhuakah pawh hian khawngaihna leh hmangaihna chi kan telh loh chuan țawngkam ngeiawm, innghirnghona leh buaina thlentu a ni thei a ni,” a ti a. A thusawi fíng tak avang chuan lal chu a lawm ta em em a.

(Mi tin engtia chhan țheuh tur nge ni tih in hriat theih nan in țawngka chhuak chu chia al, khawngaihna tel ni fo rawh se.

– Kolossa 4:6)

Keimahni



UPA LEH TUAL UPA ATAN THLANG

T.Upa Lalsiammawia Pachuau, CKTP Comt. Member chu Kohhran Upa atan thlan a ni a; Pu Malsawmtluanga leh Pu R. Lalbiakmawia, CKTP Comt. Member-te pawh Tual Upa atan thlan an ni bawk. A lawmawm kan ti hle.

CKTP HMINGIN INHLIAM KAN

March 26, 2019 khan Tv. B. Sanga Ralte, Dawrpui Vengthar, KTP insûknaa a kutzungtang hliam damlo chu Rs. 3,000-a kan a ni.

NECKTIE MAN LEH G.CONFERENCE HLA BU

KTP necktie chu Rs. 270-a zawrh remtih a ni.

Tin, General Conference Hla Bua telh tur hla theh lut duhte chuan June thla chunging theh luh tur a ni tih a ni bawk.

YRC ATAN PAWISA PE

KTP, Sakawrtuichhun Br. chuan YRC pualin Rs. 3,000/-

an thawh a, Sakawrtuichhun Branch chungah kan lawm hle a ni.

SYNOD HOSPITAL LAWM THU SAWINA

KTP-te'n April 2019 ațanga Grace Home-a cook pahnih rawihna Rs. 4,000 ve ve kan tum theih dawn avanga lawm thu sawina *Synod Hospital* ațangin kan dawng.

PYF ASSOCIATE MEM- BER ATAN KKP PAWM

Kristian Khanglai Pawl, Manipur, PYF Associate Member atana kan dilpuina chu PYF chuan a remti a, PYF Associate Member-ah ziah luh an ni ve ta a ni.

PYF-A CKTP BUDGET

PYF chuan kum 2019-2020 chungah CKTP Budget atan Rs. 79,100/- min rawn tuk.

BRANCH DING THAR

Lily Veng North, Tumpânglui, leh Falkland East Branch-te chu din thar an ni tih thu kan dawng.

SMB PAWISA PE LET

SMB-in YRC Account-a cheng nuai 15 an dah chu May 24, 2019 khan pek let leh a ni.

YRC PUALIN PAWISA PE

Lawngtlai Chanmari Bial chuan YRC pualin zan hnih inkhawm thawhlawm an lak khawm, Rs. 1,920 chu CKTP Office-ah an rawn pe.

HRUAITUTE CHHUAHNA**Tlungvel Vengthar Bial**

March 30, 2019 (Inrinni) khan Tlungvel Vengthar Biala Tlungvel Gate Veng Kohhranah Leadership Training neih a ni a. He hunah hian Pu R. Lalbiakmawia leh Pu Malsawmtluanga-te'n hun an hmang.

Sakawrtuichhun Branch

April 6, 2019 (Inrinni) khan Sakawrtuichhun Branch Leadership Training neihpuiin Pu K. Lalengzama leh T.Upa Lalrinmawia Raltete an kal.

Tlangnuam South Branch

April 6, 2019 (Inrinni) khan Tlangnuam South Branch Leadership Training neihpuiin Pu C. Malsawmtluang leh Pu P.C. Lalrinsanga-te an kal.

Khawzawl Venglai Bial

April 6&7, 2019 chhung khan KTP, Khawzawl Venglai Bial Leadership Training hmanpuiin T.Upa David

Lalmachhuan leh Tv. Benjamin Lalnunpuia te an kal.

Thuampui Branch

April 12, 2019 (Zirtawpni) zan khan KTP, Thuampui Branch-ah sawm an nih angin CKTP aiawhin T.Upa Lalmuanawma leh Pu R. Lalbiakmawia-te Leadership Training neihpuiin an kal.

Armed Veng Branch

April 12, 2019 (Zirtawpni) zan khan Armed Veng Bial KTP Leadership Training neihpuiin Upa K. Lalnunluanga leh Pu C. Malsawmtluanga-te an kal.

MTC Graduation

April 16, 2019 khan Synod Conference Centre-ah Missionary Training Centre Graduation Service-ah CKTP min sawm angin Upa Ricky Lalrammawia Ralte leh T.Upa Lalrinmawia Raltete an kal.

Champhai Zotlang Branch

April 16-18, 2019 khan Champhai Zotlang Branch KTP Diamond Jubilee lawmpuiin Upa K. Lalnunluanga leh Pu Lalruatfela-te CKTP aiawhin an kal.

HIV/AIDS**inrawn khawmna**

April 23, 2019 khan Synod Social Front buatsaih Stake-

holders Interactive Meeting on HIV/AIDS, Synod Conference Centre-a neihahCKTP aiawhin Pu Lalruatfela a tel.

YRC Night hmanpui

April ni 8, 2019 khan Chawlhmun Branch-ah YRC Night hmanpuiin YRC Sub-committee te leh Upa Ricky Lalammawia-te an kal.

PYJC Triennial Conference

May 2-5, 2019 chhung khan Presbyterian Youth Joint Committee, Phai Synod, Presbyterian Church of Myanmar chuan Khampatah Triennial Conference wawi 11-na an hman a. He hun hmanpui hian CKTP ațangin Upa Rosangliana, T.Upa Rochungnunga leh Upa Ricky Lalammawia Raltete an kal. Tin, Synfo Crew, Pu Peter Lalanpuia leh Synod Choir-te an kal baw a. Triennial Conference thupui hi, 'Miten tu nge a ni mi tih?' (Mk. 8:27) tih a ni.

CKTP hruaitute hian May 2, 2019 (Ningani) khan Khamapat an thleng a, zan inkhawmah palai lawm leh report inkhawm neih a ni. Zirtawpni chawhma dar 11:00 (Burma sana)-ah Pathian Biak Inkhawm neih a ni a, hetah hian Pu Gospel Thangmawia, Tahan Theological College lec-

turer-in 'Thalaite leh takna' tih thu a sawi a. Zan inkhawmah Rev. Zohmingthangan thupui a sawi hawng a ni.

Inrinni zing dar 7:00-a Pathian Biak Inkhawmah CKTP General Secretary T.Upa Rochungnungan thuchah a sawi a. Chhun dar 12-ah Pathian Biak Inkhawm awmin, 'Kawppui zawn dan tha' tih chu Pu C. Pazawna, PYJC Vice President-in a sawi. Zan inkhawmah thupui then hnihna, 'Miten tu nge a ni mi tih: Eibar zawnaah?' tih chu Ni. Lalnunsiami, PYJC Treasurer-in a sawi baw a ni.

Pathianni zing dar 7:00-a inkhawmah Bible Exam neih a ni a. Chhun inkhawmah Rev. Zomawia, PCM-a Mission Secretary-in 'Miten tu nge a ni mi tih: Kristian nunah?' tih a sawi a, Pathianni zan inkhawmah PYJC President kal chhuak tur Upa Lalruatkiman thuchah a sawi.

Inrinni zing inkhawm ațang hian inkhawm apiangin Synod Choir-in zaia rawng-bawl na an nei a ni.

PYJC hnuai hian Branch 37 a awm a, Meeting (Bial) 22 a awm. Member zawng zawng 2,991 an ni a, Branch inkhawm nei thei zat hi Branch 34 an ni. Triennial

JULY 2019

34

Conference-ah hian palai 836 in-report an awm bawk.

Mualkawi Branch

May 6-8, 2019 chhung khan Mualkawi Branch KṚP-te chuan an Branch din cham-phaphak vawi 60-na (Diamond Jubilee) an lawm a. He hun hmanpui hian T.Upa Lalsiammawia Pachuau leh Pu Rorelkima-te an kal. Jubilee lawmpuina atan Central KṚP hmingin Sulhnu leh Conference Hla Bu lian pek an ni bawk.

YRC Awareness Campaign

May ni 13, 2019 khan Ramhlun Vengthar Branch-ah YRC Awareness Campaign neih a ni a. YRC Sub-Committee Member-te leh Tv. Lalchhanhima, Comt. Member, CKṚP-te'n hun an hmanpui.

Sateek Bial

May 25, 2019 (Inrinni) khan Sateek Bial KṚP chuan Leadership Training an nei a. Hemi hmanpui hian sawm an nih angin CKṚP aiawhin T.Upa David Lalhmachhuana leh Pu Lalruatfela-te an kal.

Lallen Bial

May 25-26, 2019 khan Lallen Bial KṚP Leadership Training neihpuiin CKṚP

aiawhin Pu K. Lalengzama leh Upa K. Lalnuntluanga-te an kal.

**MIZORAM SYNOD
CHOIR REPORT
(May 3–27, 2019)**

Hla ṭum 4 an zir a, programme hmun hrang hrang ṭum 6 an nei bawk.

Programme neihna hmunte

1. May 3-5 chhungin PYJC Triennial Conference vawi 11-na, Khampat, Myanmar.

2. May 15-ah Wales zin report inkhawm, Mission Veng Kohhran.

3. May ni 19-ah Home Mission & Cachar Tlangram Region Missionary Retreat, Bethlehem Venglai Kohhran.

4. May ni 20-ah Aizawl Venglaiah Zaipawl Night.

5. May ni 24-ah Chanmari West Kohhranah Ram Pum Huap Kohhran Pavalai Meet vawi 4-na.

6. May ni 27-ah Maubawk Branch Musical Night.

Heng an programme vawi rukah hian vawi 16 din chhuahah hla ṭum 29 an rem.

Wales-a an kal khan Pu Zoenga leh Pi Zohmangaihiten GBP 150 an pe a, chu bakah intihsiaknaah lawmman GBP 200 an dawng bawk.



Kantu : Sevenphul Branch

CENTRAL K.T.P. HRUAITUTE 2018-2020

Office Bearers


Leader	: Rev. Dr. K. Lallawmzuala	9402551279
Asst. Leader	: Upa Rosangliana	9612166769
Gen. Secretary	: T.Upa Rochungnunga	9862658082
Asst. Secretary	: Upa Ricky Lalrammawia Ralte	9862387308
Treasurer	: Dr. Lalrotluanga	9436153937
Finance Secretary	: T.Upa Lalmuanawma	9436196515

Committee Members

Dr. David C. Vanlalfakawma	9436156561	Tv. Robert Lalduhzuala	9862368012
Pu C. Malsawmtluanga	9862587200	T.Upa Lalsiammawia Pachuau	9862742440
Pu K. Lalengzama	7308187298	Upa K. Lalnunluanga	8974240614
Pu David Lalhmachhuana	8415926838	Pu R. Lalbiakmawia	9612762602
Pu Rorelkima	9862266440	Tv. Benjamin Lalnunpuia	9862306526
Pu Lalrinchhana Ralte	9774365619	Pu P.C. Lalrinsanga	9436144233
Pu Malsawmtluanga	9612588677	T.Upa Lalrinmawia Ralte	9862359884
Pu Lalruatfela	9436705777	Tv. K. Lalchhanhima	9089933771

Ex-Officio Members

Rev. R. Lalhmingthanga	- Synod Moderator
Rev. R. Vanlalngbaka	- Synod Secretary (Sr.)
Rev. K. Lalrinmawia	- Executive Secretary i/c KTP



Postal Regn. no. MZR/81/2018-2020
RNI No. MIZMIZ/2009/29074



Printed and Published by Rochungnunga, Synod Office, Mission Veng on behalf of Kristian Thalai Fellowship
Edited by Robert Lalduhzuala and printed at Synod Press, Mission Veng, Aizawl, Mizoram. Copies – 42,000